

11-րդ դասարան

Ա: Աշխատանք բնագրով: (15 միավոր)

Հոկտեմբեր ամիսն էր. Մարկոս Անտոնիոսի՝ առյուծ լծած կառքը երևաց Տարսնում: Գեղեցիկ է Մեծ ծովի ափին բազմած Տարսնը. լազուր ջրերի ծփանքը կարող էս տեսնել դեռ հեռվից: Մեղմասահ ընթացք ունի Տարսնին առընթեր հոսող Կիդնես գետը: Եռապետը քաղաքը լցրել էր աճպարարների և նվագաձուների հոծ խմբերով: Եգիպտոսի թագուհին գալիս էր՝ Մարկոս Անտոնիոսի առջև խոնարհվելու: Երևաց Կլեոպատրայի շքախումբը. ծիրանավառ, մետաքսահյուս առագաստներով ոսկեզօծ նավի վրա շքեղաշուք հանդերձներով նստել էր թագուհին՝ որպես գեղեցկության աստվածուհի: Նավագներն արծաթազօծ թիերը շարժում էին՝ համաչափելով սրինգների հոգեպարար երաժշտությունը: Ամենուրեք գինարբուք էր. մարդիկ կարծես դարձել էին Բաքոսի երկրպագուներ: Կլեոպատրայի գլխավերևում ոսկեփայլ ամպհովանին էր. մի քանի պարմանուհիներ հովհարում էին թագուհու շուրջը, իսկ նածիստները շարժում էին երփներանգ ծաղկեփնջերը՝ գետի երկու կողմերը լցնելով զգլխիչ բուրմունքով: Թվում էր՝ չնաշխարհիկ Աֆրոդիտեն դուրս էր եկել Մեծ ծովից և զբոսանք էր կատարում Կիդնեսի վրա:

1. Գրե՛ք՝ որտեղից է առաջացել **հոկտեմբեր** ամսանունը. տվե՛ք ծագման մեկնաբանությունը: (2 միավոր)
2. Նշե՛ք՝ որտեղից է ծագում « Բաքոսի երկրպագու» արտահայտությունը, և երբ է այն կիրառվում: (2միավոր)
3. Գրե՛ք **առյուծ** բառով կազմված երեք դարձվածք և բացատրե՛ք նրանց իմաստները: (2միավոր)
4. **Աճպարար, նվագաձու, առընթեր, պարմանուհի** բառերի դիմաց գրե՛ք մեկական հոմանիշ բառ: (2 միավոր)
5. Գրե՛ք **նվագաձու, հովհար, գինարբուք** բառերի հարանունները և բացատրե՛ք իմաստները: (1 միավոր)
6. Տեքստում որո՞նք են **նավաստի, մավի, ստվար, արբեցնող, աղախին** բառերի հոմանիշները: (1 միավոր)
7. **Առընթեր** բառում նշե՛ք կատարված հնչունափոխությունը, նշե՛ք բաղադրիչները: **Թեր** արմատը ի՞նչ իմաստով է գործածված: Գրե՛ք նույն արմատի համանուն բառը և բացատրե՛ք իմաստը: (2 միավոր)
8. **Հանդերձ, դուրս, կարծես, շուրջ** բառերը տեքստում ի՞նչ խոսքի մասերի արժեքներով են հանդես եկել : Ուրիշ ի՞նչ խոսքիմասային պատկանելություն ունեն նշված բառերը: (2 միավոր)
9. **Մեծ ծով** բաղադրյալ հատուկ անվան նմանողությամբ գրե՛ք որակական ածական պարունակող չորս ծովի անուն: (1 միավոր)
- Բ. Շարադրություն՝ « Ի՞նչ են պատմում հուշարձանները » վերնագրով (երկու էջի սահմաններում) : (5 միավոր)